

## إلي من يهمة الأمر

أنا عاشقة عنيك جدااااا  
ولون الورد ف كعابك  
وعاشقة الليل علي جفونك  
ودقة قلبي علي بابك  
وعاشقة الشعر لونه أبيض  
وشبه الغيرة ف عتابك  
أنا عاشقة النهار يطلع  
و أنا دايبه ف اعتابك  
تقول مواويل .. أقوم اسمع  
ونتذكر سوا احبابك  
أنا فاكرة اللي عدي وكان

وفاكرة من بعيد ب زمان  
و فاكرة دموع وحرقتنا  
كثير،نتشارك الاحزان  
وفاكرة ليالي عشرتنا  
ومين قال لك واحشني ياخال  
وفاكرة سنين ف غربتنا  
وتجري معايا ف الترحال  
أنا فاكرة أبوك و امك  
وكل مواقف الايام  
ومين حس ف لقاك فرحة  
ومين فسر لك الأحلام  
أنا مش ناسية أوجاعنا  
ومين شكيناله وسمعنا  
ومين بارك حكايتنا

ومين شمتان لفرقتنا  
ومين زارنا وشاف بيتنا  
ووشه .. قلب الألوان  
أقول لك سر ...  
انا بتناسي فرقتنا  
وأغيب ف النوم  
و أوهم نفسي  
ان فراقنا مش هيدوم  
واعمل اني بستناك  
غيابك كلهم كام يوم  
و ألبس أحلي ما عندي  
وأحط الشال  
و احضر لك كلام يتقال  
والجيب لك بن ومحوج

واظبط لك كمان الشاي  
أقول لك سر من تاني ..  
انا بضحك علي الدنيا  
واقول هنسأك  
لكن بيني وبين قلبي  
اخذنا العهد...  
تعيش العمر جوانا  
وتفضل كل يوم ف البال !